

0.11.2021

UKA2021/82

**Kinguaassiuutitigut peqquserlunnikut sakkortunerusumik pineqaatissinneqarsinnaalernissaat pillugu Naalackersuisut Naalagaaffimmi oqartussaasunut saaffiginnissuteqarnissaat pillugu Inatsisartut aalajangiiffigisassaattut siunnersuut.**

(Atassutip Inatsisartunut ilaasortaataitai)

Kinguaassiuutitigut peqquserluttoqarsimatillugu pineqaatissiisarnerup sakkortusinissaa siunertaralugu Naalackersuisut Naalagaaffimmi oqartussaasunut saaffiginnissuteqarnissaat pillugu Inatsisartut aalajangiiffigisassaattut siunnersuut Atassutip Inatsisartuni ilaasortaataitasa siunnersuutaat Siumumiit ima oqaaseqarfigissavarput.

Nunatsinni kinguaassiuutitigut peqquserluuteqartarnerit amerlasoorujussuunnerannut oqariartuutaasartut misissuinerit assigiinngitsut takutittaraat Siumumi ajuusaarnartutut isumaqarfigaarput. Taakkualu peqquserluuteqartarnerit ajoraluartumik takutittarpaat meerannguanit utoqqarnut kinguaassiuutitigut peqquserluttarnerit pisartut – tamannalu annernarluinnaqqissaarpoq, taamaammallu ajornartorsiutip millisaaviginissaanut inuiaqatigiittut iliuuseqartuartaqartugut Siumumi isumaqarpugut.

Ukiorpassuannngortuni pinaveersaartitsineq annertoq inuiaqatigiinni ingerlassimagaluarlutigu kinguaassiuutitigut peqquserluuteqartarnerit ataatsimut katikkaanni malunnaatilimmik appariaateqarneq ajornerat assorsuaq uggornartuuvoq, akiuniarnermimi inuppassuit nukippassuillu atornerqartarput ilaatigut soorunami iluatsitsiffiusartumik. Pinaveersaartitsinernilu taakkunani nikalluaallutik suliaqartut suliaqartarsimasullu Siumumiit aammaarluta qamangga pisumik qutsavigiumavagut.

Maannamut pineqaatisseeriaaseq qivaraanni kukkuneruallaasangilaq oqarutta pinerluuteqarsimasoq pinerlineqarsimasorlu piffissap sivikitsuinnaap qaangiunnerani nunaqarfimmini illoqarfimminniluunniit inooqatigeeqqilersarmata. Tamanna soorunami toqqissisimanartuunngilaq, aammalu pinerluuteqartoqaqqinnginnissaa kiisalu toqqissisimasumik inooqqilertoqarnissaa qulakkeerumallugit iliuusissat annertusarneqartariaqarnerannik pisussaaffiliipput.

Ajornartorsiutip akiorniarnernani politikikkut iliuusaasut Siumumiit pitsaasutut isumaqarfigaarput, tassami kinguaassiuutitigut atornerluisarnerup akiorniarneqarnerani maannamut inatsisitigut sukaterinerit arlallit ingerlanneqarsimalerput, taakkualu soorunami kinguneqarluartitsisimanissaat Siumumiit naatsorsuutigilluinnarpagut.



Siunnersuuteqartut ugartugaat, tassalu kinguaassiutitigut peqquserluttoqarsimatillugu

pineqaatissiisarnerup sakkortusineqarsinnaaneranik ujartuineq Siumumiit tunngaviusumik tapersersornartipparput, taamatulli iliornerinnakkut ajornartorsiutip annikilliertulernissaanik eqqarsarneq piviusuungitsoq Siumumi isumaqarluta. Tassami pinerlineqarsimasut taamatullu pinerluuteqarsimasut inuiaqatigiinnut pitsaasumik toqqissisimanartumillu akuulerseqqinneqarnissaat siunertaralugu iliuusissat pineqaatissiinerup saniatigut suliaassanngortarput, taakkuuppullu inuiaqatigiittut ukiorpassuarni annikippallaamik Siumup isumaa naappertorlugu iluatsitsiffigisimasagut. Siunnersuuteqartulli pineqaatissiinerup sakkortuninngortinnissaanut tunngavilersuutaat ilaatigut taakkununga sammiveqartinneqarmat Siumumiit iluarisimaarnartipparput.

Ukiukitsunut kinguaassiutitigut peqquserluuteqartarnerit eqqarsaatigalugit sakkortunerusumik pineqaatissiisinnaanermut tunngasoq Inatsisartuni qanittunnguami sammivarput, tassanilu oqallinneq isumaqatigiiffiusorujussuusoq eqqarsaatigalugu tamanut isiginnittumik pineqaatisseeriaatsip maanna atuuttup nalilersorluarneqarnissaa Siumumiit isumaqarfigaarput, taamaammallu siunnersuutip massumap Naalakkersuisut suliaqarnerannut ilanngullugu pineqarnissaa Siumumiit naappertuulluarnerusutut isigillutigu.

Naggataatigut Siumumiit kinguaassiutitigut peqquserluuteqartarnerit akiorniarneqarneranni suleqataanissarput suleqataajuarnissarpullu oqariartuutigerusupparput, iliuusaasinnaasullu pitsaasut kinguneqarluartussallu tamaasa atorlugit iliuuseqaqataarusunnerput apuukkusullutigu.

Taamatut oqaaseqarluta aalajangiiffigisassatut siunnersuut manna ataatsimiititaliami susassaqartumi suliarineqarnissaa inassutigaarput.

Anders Olsen, Siumut.